



ANN ANGELA REDACTORA NA DIARIO

Como un persona cu a studia e profesion aki Ann Angela a aserca DIARIO pa un trabao y asina el a drenta den servicio cu Agencia Arubano di Noticia dia 1 di September 1994.

"E trabao ta un reto sin fin pa mi. Tur dia bo tin cu prueba bo mes completamente di nobo."

E trabao di redaccion ta exige hopi di bo?

"Si, e oranan largo, e seis dianan di trabao pa siman ta cay mi pisa. Ta danki na e sosten di mi famia cu mi por

traha e trabao aki y banda di dje haci trabao voluntario y dedica na tur mi otro pasatiemponan. Ta mi famia ta carga mi. Sin nan lo mi no ta ni na Aruba".

Cual ta e noticia/nan cu a sosode e aña aki cu mas a conmove bo?

"No ta pasa un dia cu mi no ta consumi cu cualquier noticia, sea cu ta den corant, na radio o na television. Especialmente noticianan di gobierno, di politica o di gruponan religioso ta pone mi rabia masha hopi mes. E noticia por ehempel cu un

chabelito cu ta sirbi como consehero di ministro ta gana mas pa luna cu un pareha pensiona ta haya pa biba cu ne pa aña, a laga mi

rabia asina tanto cu mi a hera rementa. Pero eigenlijk mi no por bisa kico a conmove mi mas e aña aki, pasobra tur dia tin algo."

Kico pabo ta noticia?

"Noticia ta loke a pasa ayera cu mi ta haya cu bo mester ta na altura di dje awe y cu mi kier pa bo no haya sa di ningun otro manera cu no ta via DIARIO".

FOTOGRAFO RICARDO JIMENEZ



Ricardo a cuminsa traha cu DIARIO dia 1 di November 1996 como fotografo. E motibo cu Ricardo a scoge pa e trabao aki ta pa e oportunidad di por desaroya su mes den e mundo di fotografia, ya cu pe e trabao aki tin un reto nobo tur dia. Pa Ricardo den e trabao aki

bo ta haya hopi contratiempo ya cu den e trabao aki bo no tin un schedule exacto. Y mas aun cu e hendenan no ta cumpli cu horario cu bo ta hayabo cu ta atrasabo pa algun of otro motibo cu constantemente bo ta cay laat pa un que otro actividad cu bo tin ariba bo schedule.

CALIFORNIA TA ESTADO "GORDO" DI ELECCION

California, ta e premio gordo di eleccion awe na Merca y aliadonan demócrata di president Bill Clinton lo por gana aki despues di 16 aña di reinado ininterumpi di republicanonan. Segun sondecan e candidato demócrata pa cargo di gobernador, Gray Davis di 55 aña di edad, lo bira sucesor di Pete Wilson, kende constitucion di e estado mas rico y pobla di e Union ta impedi pa opta pa un di tres mandato.

Den ultimo encuesta di Los Angeles Times, Davis tabata tin ventaha di 11 punto riba e republicano Dan Lundgren, di 52 aña di edad cu 53 % di intencionnan di voto contra 42 % pa e rival. Manera tur su compatriotanan, e californianonan ta yama awe pa pronuncia riba cantidad di cargo electivo, local y nacional. Nan ta eligi nan gobernador y renoban 52 asientonan den Camara di Representantenan di Washington, y tambe un di nan dos senadornan.

Den eleccion pa senado, e titular demócrata ta cabez cabez cu e republicano Matt Fong. Tambe tin e dos referendumnan cu ta riba prohibicion di consumo di carni di cabay y presencia di casinonan riba reservanan indianan.

E eleccion mas importante ta esun pa cargo di gobernador.

Esun eligi, cu durante 4 aña lo dirigi e estado di 33 miyon habitante, por influ-

encia eleccion presidencial na november 2000 y eleccion pa Camara di Representantenan.

En total, Dan Lundgren, y Gray Davis mester a gasta casi 47 miyon dollar, cu ventaha economico tambe pa e demócrata.

E campaña, sin gran emocion, a tuma lugar esencialmente pa medio di anuncio nan na television, y desventuranan politico -sexual di Bill Clinton practicamente no a wordo menciona.

Dan Lundgren, actual ministro di husticia di estado a destaca su experiencia den lucha contra crimen, pero Gray Davis cu ta ocupa cargo di vice gobernador di California, number dos den herarquia estatal, parece a seduci votadornan centrista describiendo su adversario como un conservador extremista.

"Dan Lundgren no ta mal hende, pero e ta mal eleccion pa California", segun Gray Davis na final di su di cuatro y ultimo debate. "E ta simplemente desfasa den demasiado tema. E lo hiba nos atras".

E strategia a funciona; un reciente sondeo di Los Angeles Times a indica cu 45 % di republicanonan modera tin intencion di voto pa e candidato demócrata.

A pesar di e proceso di destitucion cu a cuminsa na Washington, president Bill Clinton ta sigui ta popular den un estado cu el a mima desde su yegada na poder na 1993. Su problemanan politico parece ta costa e

republicanonan mas caro cu e demócratanan.

Segun un encuesta di Los Angeles times, cerca di 3/4 di probable votantenan a indica cu su aventura sexual cu e ex becaria di Cas Blanco Monica Lewinsky no ta influencia nan intencion di voto. Pero entre e 26 % cu a indica cu e escandalo a pone cu nan ta bay vota, solamente un mayoria debil tin intencion di vota demócrata.

Desde 4 aña e bida politico na California ta domina pa cuestionnan relaciona cu inmigrantenan hispano, principalmente despues cu gobernador Pete Wilson a haci campaña na 1994 na favor di un medida cu ta nenga acceso di indocumentadonan na educacion, sanidad y otro servicicionan publico di estado.

E dos candidatonan a concentra nan esfuerzonan na caricia hispanonan cu ta representa casi 30 % di poblacion y 11 % di votadornan. Pero como ni Gray Davis ni Dan Lundgren ta domina e idioma di Cervantes, nan a confia na otronan e tarea di transmiti nan mensahe.

Yiu muher di Dan Lundgren, Kathleen cu ta papia tur dos idioma, a afirma den anuncio nan difundi pa cadenanan di television na Spaño cu "su tata lo ta un gran gobernador", mientras cu president hispano di asamblea di California Antonio Villaraigosa ta recorda cu Gray Davis "a lucha cu nos".